

Na osnovu čl. 12. Zakona o udruženjima i fondacijama («Sl. Novine F BiH br. 45/02»), Osnivačka Skupština Udruženja estradnih izvođača ZE-DO Kantona koja je održana dana 09.03.2004. godine, d o n o s i :

POSLOVNIK

O radu Skupštine Udruženja estradnih izvođača
Zeničko-dobojskog Kantona

Član 1.

Poslovníkom o radu Skupštine Udruženja estradnih izvođača Zeničko-dobojskog Kantona (u daljem tekstu: Poslovník) utvrđuje se način pripreme i sazivanja Skupštine Udruženja estradnih izvođača ZE-DO Kantona (u daljem tekstu: Udruženje estradnih izvođača), kao i rad Predsjedavajućeg Skupštine Udruženja.

Član 2.

Skupština Udruženja radi na osnovu ovlaštenja i nadležnosti utvrđenih Zakonom o udruživanju i fondacijama, član 12. donosi odluku o formiranju Udruženja i Statut Udruženja.

Član 3.

Skupština Udruženja se sastaje po potrebi, a najmanje jednom godišnje.

Član 4.

Skupštinu Udruženja saziva Predsjedavajući Skupštine Udruženja prema vlastitoj procjeni, a može se sazvati i na zahtjev jedne trećine članova Skupštine Udruženja.

Član 5.

Skupština Udruženja zakazuje se dostavljanjem poziva najmanje 15 (petnaest) dana prije održavanja Skupštine.

Član 6.

Prijedlog dokumenata za Skupštinu Udruženja utvrđuje Komisija za pripremu Skupštine, koja je predložena od strane Ministarstva za kulturu Kantona (Osnivačka Skupština), a dalje za buduće sazive, Predsjedavajući Skupštine Udruženja.

Član 7.

Na sjednici Skupštine Udruženja, pored članova Skupštine Udruženja, mogu se pozivati i ostali članovi Udruženja.

Na sjednice Skupštine mogu se pozvati i resorni Kantonalni ministar ili neko drugi iz vlade Kantona.

Član 8.

Prisustvo članova Skupštini Udruženja sjednicama je obavezno, a u slučaju spriječenosti, članovi Skupštine Udruženja dužni su svoje neprisustvovanje najaviti prije održavanja sjednice.

Ukoliko se dogodi da svoje prisustvo zakazanoj sjednici opravda i otkaže više od polovine članova Skupštine Udruženja, Predsjedavajući Skupštine Udruženja će odgoditi sjednicu i zakazati novi termin održavanja sjednice.

Član 9.

Diskusija o pojedinim pitanjima vodi se prema dnevnom redu, a učesnici u diskusiji dobijaju riječ po redoslijedu prijavljivanja.

Član 10.

Svaki učesnik u diskusiji po jednoj tački dnevnog reda, u principu, može da diskutuje samo jednom.

Diskusija traje najviše 5(pet) minuta, a eventualna replika 3(tri) minuta.

Član 11.

Nakon završene diskusije, Predsjedavajući Skupštine Udruženja predlaže odluke, zaključke ili stavove po odredjenom pitanju.

Član 12.

Skupština Udruženja može punovažno raditi ukoliko sjednici prisustvuje nadpolovična većina članova Skupštine Udruženja. Odluke Skupštine Udruženja su punovažne, ukoliko se za njih izjasni većina prisutnih članova Skupštine Udruženja.

Član 13.

Odluke, zaključci i stavovi Skupštine Udruženja obavezni su za sve članove.

Član 14.

Na sjednici Skupštine Udruženja vodi se zapisnik. Zapisnik sadrži datum i vrijeme održavanja sjednice, dnevni red, kratak sadržaj diskusija o svakom pitanju, kao i precizirane odluke i zaključke koje je Skupština Udruženja usvojila po svakoj tački dnevnog reda.

Usvojeni zapisnik i materijali sa sjednice predstavljaju dokumentaciju Skupštine Udruženja.

Član 15.

Sjednice Skupštine Udruženja mogu pratiti sredstva informisanja, ili se o pojedinim tačkama dnevnog reda može izdati saopštenje za javnost, te organizirati konferenciju za štampu.

Saopštenje za javnost daje predsjedavajući Skupštine Udruženja, a u njegovoj odsutnosti član Skupštine, koji predsjedava Skupštini, koga on ovlasti. Skupština Udruženja može odlučiti da sjednica bude zatvorena za javnost.

Član 16.

Svi članovi Skupštine udruženja i učesnici sjednice dužni su da se pridržavaju Poslovnika o radu.

Ukoliko se bilo ko od članova Skupštine Udruženja i učesnika sjednice ne pridržava Poslovnika, Predsjedavajući Skupštine Udruženja može mu oduzeti riječ ili u težim slučajevima ometanja rada sjednice isključiti ga sa sjednice.

Član 17.

O primjeni Poslovnika starat će se Predsjedavajući Skupštine Udruženja ili član Skupštine Udruženja koji predsjedava sjednicom u odsutnosti Predsjedavajućeg Skupštine Udruženja.

Član 18.

Poslovnik stupa na snagu danom usvajanja i primjenjivat će se odmah nakon usvajanja.

Broj: 02/04
Zenica, 09.03. 2004. godina

